

欽
定
全
唐
文

欽定全唐文卷一百十三目錄

後唐閔帝

準優經學出身選任詔

令三京諸道祭山川祠廟詔

立藩鎮神道碑詔

禁滯獄詔

定奪情限制勅

後唐末帝

諭在京文武令

即位赦制

令修撰實錄制

優賜勸進人等詔

答李元龜請降優恩詔

誅朱宏昭等詔

答周元樞陳十事詔

加吳山王號詔

速斷淹滯詔

停孔知艸等官詔

定酬獎能理冤獄詔

申明長興二年勅錄寫律令格式六典詔

免楚祚死詔

委三司重議稅法詔

賽祭得雨詔

準徽陵行事官減選詔

祈晴詔

御署官準同一任正官期限赴選詔

許朱宏昭等歸葬詔

金史卷一百一十三
二
祈晴詔

祈晴詔

清理庶獄詔

禁官吏通衢陳訴詔

準姚顗六典分銓詔

停冬至朝會儀詔

祈雪詔

免放被兵諸州兩稅詔

禁約軍將詔

修奉列聖陵寢詔

褒答杜崇龜詔

施行程遜等所陳時務詔

褒答馬勝詔

答盧文紀陳政事詔

答盧文紀請對便殿詔

答盧文紀請追尊宣獻太后詔

令監祭使省視祭物詔

禁盛夏滯獄詔

禁進奉異物詔

量準盧損不便時宜條件詔

答盧損陳五事詔

答劉鼎請依故事薦人自代詔

答許遜請停越局言事詔

飭中書舍人詔

廟諱偏旁不宜全改詔

以安崇贊爲孟州司馬詔

量定廢秦王葬禮詔

選京員爲兩使判官畿赤縣令詔

附監舉人分別解送詔

答石敬瑭詔

以夏令赦宥御札

欽定全唐文卷一百十三

後唐閔帝

帝諱從厚明宗第三子唐天祐十一年生長興元年封宋王四年十一月即位應順元年四月被廢爲鄂王旋遇害在位一年年二十一晉天福元年追諡曰閔皇帝

準優經學出身選任詔

參選之徒艱辛不一發身遲滯到老卑低宜優未達之倫顯示惟新之澤其經學出身一任兩考元勅入中下縣令下州錄事參軍起今後更許入中下縣令中州下州錄事

參軍一任三考者於人戶多處州縣注擬如於近勅條內資敘無相當者即準格循資考入官其兩任四考者準三任五考例入官餘準格條處分不得起折

令三京諸道祭山川祠廟詔

朕猥以冲人獲膺大寶賴神祇之贊助顯天地之休禎夷夏駿奔式符於睠命聲教綿遠虔荷於炳靈德薄承祧憂深馭朽克奉治平之道諒繇冥助之功集是殊祥敢不寅畏賴陰陽行運致時雨以應期稼穡順成得歲功而叶望咸臻上瑞普泰兆民宜令三京諸道州府界內名山大川

祠廟有益於民者以時精虔祭祀稱朕意焉

立藩鎮神道碑詔

今後藩侯帶同平章事已上薨謝者並差官撰文宣賜未帶相印及刺史以令式合立碑者其文任自製撰不在奏聞

禁滯獄詔

刑柄爲制禮之先獄訟乃有國之重一成共守四海同文咸符欽恤之言乃致太平之道以近及遠列職分司申明皆有其舊規決斷各繇其所屬惟理則罪疑可定惟正則

刑措可期諒在舉行方無壅滯應三京諸道州府繫囚據罪輕重疾速斷遣比來停滯須奏取裁不便區別故爲留滯今後凡有刑獄據理斷遣如有勅推按理合奏聞不在此限

定奪情限制勅

凡在苴麻並須終制比有金革遂有奪情孝以移忠藉其陳力其內諸司使副帶西班正官者宜候過卒哭起復授官不帶正官者及供奉官殿直承旨等宜過卒哭休日赴職其有帶東班官者祇以檢校官充職服闋日加授前職

後唐末帝

帝諱從珂本姓王氏鎮州人唐光啟元年生明宗養爲已子長興四年封潞王應順元年四月以兵脅廢閔帝遂自即位晉高祖入洛舉族自焚在位二年年五十二

諭在京文武令

余叨居冢嫡謬列盤維成家於十死九生立國於千征萬戰事父母敦於至孝爲臣子敢於盡忠將期夾輔之勲以廣文明之祚一昨先皇晏駕嗣聖承祧敢不遵周召以勤王相成康而在位社稷旣然有奉人民於是知歸但固宗

祊敢論季孟豈意梓宮在阼靈駕未歸而朱宏昭馮贊等
妄興猜忌之心驟起窺圖之計喪紀在近除書遽行津涯
莫知迫促尤甚況又不宣麻制便降使臣立遣離藩俾其
懼禍霆電之速軍民可知是以聊葺城池以緩礮机十鎮
驅貔貅而遽至六師擁組練以齊來當此阽危如何旅拒
不謂天道鑒其非罪人情愍以無辜憚以攻城自來束手
數鎮憑陵之帥立自滅亡九重侍衛之師翻爲心腹以至
抱義者感泣懷憤者咄嗟凡百有知皆悲無罪今則軍戎
大集園寢將成羣帥獻忠迫令赴闕載念遺弓在近仙駕

將歸旣息憂惶又盈哀慘今則須將禁旅入赴山陵面朝
太后太妃自訴爲臣爲子今月二十七日已次陝州其在
京文武兩班內諸司使務除朱宏昭馮贇家族伏法外凡
百士庶並無憂疑況禁令嚴明軍都整肅必無暴犯克保
平寧苟渝此言何以行令

即位赦制

王者司牧兆民寵綏四海爰屬統臨之始宣布渙汗之恩
仰測天心俯從人欲所以春秋冬夏四時先布於發生草
木禽魚萬彙乃期於蘇息伏念大行皇帝承天眷祐立極

艱難繫予眇躬嘗佐興運櫛風沐雨從湯征而多厯勤劬
匣劒櫜弓贊周道而克成底定爾後繼持玉節獲受桐珪
事君必盡於忠誠爲子益堅於孝道諒穹蒼之可鑒冀宗
社之永寧旋屬杞國人憂荆山鼎就痛攀髯之靡及念同
軌之將臻爰自汧岐徑朝伊洛所冀宿參蜚輅親奉山陵
纔覲宮闈旋承告令百辟堅陳於勸請三讓莫諧六師共
切於推崇羣情益固昔夏啟以謳歌有屬能承大禹之基
漢文以將相叶心克嗣高皇之業顧惟小子豈逮前王自
續鴻圖如登虎尾惟當慎終若始居安慮危保七百載之

延昌致億兆人之開泰將布改元之令爰敷在宥之文宜
改應順元年爲清泰元年可大赦天下四月十六日昧爽
已前內外見繫囚徒據罪已發覺未發覺已結正未結正
罪無輕重常赦所不原者咸赦除之應左降官及徒流人
與量移已量移者更與量移已放歸者量與敘錄應內外
文武臣寮節鎮州府等使刺史文武職員將校並與加恩
應自鳳翔扈駕員寮凡主兵主事者各賜功臣名見在京
隨駕并諸道馬步將士並與等第優給並從別勅處分自
二月十四日西來文武參佐沒於王事者各與追贈仍敘

錄子孫隨駕前資文武官寮并量才任使鳳翔民李存劉
實罄出家財以助軍賞並與命官起事之初鳳翔三城民
戶多遭燒燬並宜本道檢視量給瓦木工價各令修葺自
岐雍華陝已來王師所經踐履去道三里內夏稅並與放
免應三京諸州府長興三年十二月已前欠夏秋殘稅並
與除放其鳳翔即自長興四年十二月終已前並放

令修撰實錄制

恭惟先皇帝夷凶靜亂開國承家社稷危而再安乾坤否
而復泰宏宣一德寵惠兆民八年之間家給人足然而致

理之績雖已播於頌聲紀事之書尚未編於史氏緬惟績
奉之道良增愧惕之懷其實錄宜令史館疾速修撰呈進
惟務周詳勿令闕漏

優賜勸進人等詔

應勸進諸選人前京兆府武功令龐濤而下四百九十有
四人方在京都邁茲際會既同勸進宜示獎勵其前資州
縣官及黃衣進選人近日緣少闕員難於減選候合格日
各超一資注擬行事官亦於注擬時優與處分長流人已
歸本貫即以赦書節文處分攝試官推巡令錄宜并許比

三轉出身判司衙推主簿比明經出身各守選限自今年始合格日與初官宗子未有出身者與出身有出身者同選人例處分給與憑據

答李元龜請降優恩詔

李元龜官處法司次當候對以稍憊於時雨請特降於優恩初則以貶謫官亡歿外州乞容歸葬次則以亡歿者兒孫絕嗣請本處瘞埋宜依所陳頒告諸道

誅朱宏昭等詔

樞密使朱宏昭馮贇宣徽南院使孟漢瓊西京留守王思

同前邠州節度使藥彥稠共相朋煽妄舉干戈互興離間之謀幾構傾亡之禍宜行顯戮以快羣情仍削奪官爵

答周元樞陳十事詔

請再示賞罰提舉縣令事百里象雷之地一同製錦之人期在養民豈宜失職諸州觀察使刺史嚴切提撕請牢籠俊乂搜訪賢良沉選部貢闈每年慎擇尚慮貞廉之士愧趨躁競之門諸道廉使更宜搜訪請斷無名率配委三司使省奏舉行請止急徵暴賦況秋夏徵科自有常限宜令官吏不得踰違

加吳山王號詔

吳嶽成德公昨遇亨期克申幽贊宜加王號以表神功可
進封靈應王其祠享官屬仍舊同五嶽擇日冊命

速斷淹滯詔

在京諸獄及天下州府見繫罪人正當暑毒之時未免拘
囚之苦誠知負罪特軫予懷恐法吏生情滯於決斷詔至
所在長吏親自慮問據輕重疾速斷遣無令淹滯

停孔知鄴等官詔

改元重事告廟常規凡在班行宜思策勵孔知鄴等方當

任使皆合恪恭豈可居常則各冒寵光臨事則自圖便穩
苟無懲誠何肅紀綱孔知鄴華光遠並停見任其告廟官
差右武衛將軍高允崇

定酬獎能理冤獄詔

義存兩造善推鞠者故合獎酬法貴一成務欽守者豈煩
更改劇可久所陳章奏備驗忠勤然於取舍之間未盡諮
詢之理其軍巡使都虞候能覆推刑獄雪活人命及推按
不平致人負屈者起今後宜以長興四年五月二十三日
勅條施行合有獎酬亦等第比附行遣其故入人罪律有

本條何煩別定

申明長興二年勅錄寫律令格式六典詔

長興二年閏五月勅律令格式六典凡關庶政盡有區分
久不舉明遂致隳紊宜令京百司各於其閒錄出本司事
裁成卷軸或粉壁寫在廨署本司官常宜省覽以備顧問
自勅下至今累年如聞諸司或以無廨宇處並未書寫施
行宜令御史臺差兩巡使分巡百司局以聞如因事未辦
處與限五日須抄錄依元勅指揮其諸道州縣亦有六典
內合行公事條件抄錄粉壁官吏常宜觀省其律令格式

事繁昨以撮成四卷州縣差人抄錄以備檢尋今後宜令御史臺每至正初具錄前後勅文告示諸司及州府永爲常式

免楚祚死詔

朕自中春釁生家國長子重吉遽陷無辜其供奉官楚祚乘幼主之猜嫌徇賊臣之指使纔聞差使遽自請行坐情過甚於仇讎臨法不依於制度恣加凌辱隱奪資財縱便致於族誅亦未平於深恥朕再惟大體不欲極刑抑沈痛於恩情示好生於天道且令遠斥粗釋幽冤宜配登州長

流百姓常知所在其父西京副指揮使處章放令自便縱逢恩赦不在齒錄之限

委三司重議稅法詔

朕嘗領藩條屢親政事每於求理務在卹民況今子育萬方君臨四海日愼一日思漸致於小康雖休勿休冀終成於大化得不察生靈之疾苦知稼穡之艱難俾蠲積弊之原庶廣惟新之澤省三司使奏自長興元年至四年十二月已前諸道及戶部營田逋租三十八萬八千六百七十二端匹束貫斤量或頻經水旱或併值轉輸悉至困窮感

成逋欠加以連年災沴比戶流亡殘租空係於簿書計數
莫資於經費蓋州縣不公之吏鄉閭無識之夫乘便欺官
多端隱稅三司使患其僥倖便欲推尋朕閱彼蒸黎慮成
淹滯示體物憂民之旨徵滌瑕盪垢之文特議含容且期
均濟應自長興四年已前三京諸道及營田委三司使各
下諸州府縣除已納外並放應有逃戶除曾經釐革外所
有後來逃移者委所在觀察司使刺史速下本部徧令招
撫歸業除放八月後至五年八月並得歸業所有房親鄰
近佃射桑田不得輒有占據如自越國程故不收認其所

金史卷之三
徵租稅卻從清泰元年四月後委三司重行釐革別議施行舉賞罰之明條立徵催之年限不得更欠租稅致啟偉門勉懷成務之勤以副劇繁之選有要行事件三司畫一奏聞仍報中書門下不得漏落

賽祭得雨詔

昨以稍愆時雨慮損嘉禾朕親赴龍門遍申祈禱甘澤尋降豐稔可期宜令元差禱雨官各赴祠宇昭賽

準徽陵行事官減選詔

應徽陵行事官各無遺闕已議獎酬比少闕員難以減選

遂許合赴集日各與超資今又懇有披論宜特與減一選其今年合格者便委南曹磨勘送銓注擬來年合選者勒赴冬集所司磨勘無遺闕旋送銓免取文解其去冬判成未得官者宜先注擬應前任正授賓從亦宜減一年無年可減便與擬授

祈晴詔

苦雨連綿已逾旬浹差官祈禱尚未晴明宜令宰臣李愚劉昫盧文紀姚顗各於諸寺觀虔告

御署官準同一任正官期限赴選詔

應自鳳翔及沿路迎接隨從到京州縣等官或昔經患難
罄竭忠勞或遠奉乘輿奔馳扈從既各憑其御署遂溥降
於優隆爰示等差特行釐革所有自振武西京河中鳳翔
已前御署員寮或因無員闕權且補差或託彼薦論偶經
任使不可悉謀援例便望授官將堙僥倖之源須立區別
之限自八月三日後應所稱御署官員除內有處分特行
恩澤外其餘稱御署並許逐攝同一任正官依限期赴選
不得更令進狀及與施行

許朱宏昭等歸葬詔

朱宏昭馮贊孟漢瓊康義誠王思同藥彥稠等朕志切行
仁情惟念舊雖顛覆自貽其伊戚而愍傷猶軫於予懷宜
降特恩許其歸葬其親屬骨肉及元隨職員並放逐便所
在不得恐動

祈晴詔

久雨未霽禮有祈禳崇都城門三日不止乃祈山川告宗
廟社稷宜令太子賓客李延範等崇諸城門太常卿李懌
工部尚書崔居儉告宗廟社稷

祈晴詔

李德舟顯陳藝術特貢封章以霖雨之爲災恐災盛之不稔請修祈醮以示消禳恭以天地星辰宗廟社稷雨師風伯皆遵祀典薦告不虧名山大川履行祈禱今據德舟所陳據祠禱不該者所司嚴潔祠祭以表精虔

清理庶獄詔

霖淫稍甚愆伏爲災朕燭理不明慮傷和氣都下諸獄委御史臺差官慮問西都差留守判官藩鎮差觀察判官刺史州委軍事判官諸縣委令錄據見繫罪人一一親自錄問恐奸吏逗留致其淹抑及時踈理如是大獄即具奏聞

禁官吏通衢陳訴詔

官吏通衢陳訴比來時亦有之若抱屈難伸或有理未雪固難抗節須至望塵至於方潔之人猶以爲恥近則無知之輩遽相倣例寢以成風頻至於列肆長街遮闌宰臣陳訴及其處理多礙格式或勅命已行確祈追改亦於赦條之外妄有披論不惟紊亂於紀綱抑亦有同於輕侮此後州縣官或有所陳并於中書門下據事理陳訴如實有屈塞登時即與勘窮如是僭越虧公付銓量與殿選如不關銓量陳訴者即下法司推詰所冀羣官奉法勉令進取以

澆訛萬國來王復覩朝廷之整肅

準姚顗六典分銓詔

姚顗所奏銓管實合規程不唯六典昭彰抑亦三銓整肅而長定格是聖朝重定條件甚精若令千載以無隳必使萬方而有則俾其復舊深合羣情如聞依循資格行用年深事條差舛必須詳正方免弊訛其分銓事宜依循資格宜令吏部三銓尚書郎南北曹給事中參詳其間條件如其舛誤即釐革以聞

停冬至朝會儀詔

初成園陵彌軫孝思遽履節辰尤增顧復所奏各儀宜停

祈雪詔

朕君於人上燭理不明自冬初迄今未降密雪深虞愆伏
災及黎民宜令宰臣百寮分詣諸祠壇祈告

免放被兵諸州兩稅詔

朕猥將寡昧虔嗣宗祧草木蟲魚思宏於覆育蠻夷戎狄
固切於綏懷睠彼契丹孤我恩信忽驅族類擾亂邊陲殺
害生靈窺窬保障惟貨財是視殘疾是行逞虐肆凶莫甚
於此人神之所共怒天地之所不容今則上將臨邊衆軍

大集尅日必成於盪定望風已報於奔逃雖料彼戎夷他日終期於菹醢而顧予生聚此時方抱於瘡痍或骨肉分離或邱園荒廢凝旒載想過在朕躬將卻復於阜繁宜特行於卹隱應振武新州河東西北邊經蕃戎蹂踐處百姓兩稅差配今日後並放三年宜令逐處長吏分明曉諭其人戶陷蕃者宜令設法招尋各令歸復稱朕意焉

禁約軍將詔

夫命將所以行兵聚兵所以遏亂必在上下有理進退無違入則畏法以謹身出則圖功而效命畏法必無罪戾圖

功則有寵恩以此言之不可不慎王彥塘方期任使輒敢恃憑既都將以上言在軍法而難恕況屬環衛并在藩方上至偏裨下及行伍皆是久經訓練備曉條章官爵甚高衣糧極厚必能共思整戢自務保全是宜特舉規程徧加曉諭責令遵守務肅轅營今後在京及諸道馬步將士上至都尉下及長行並須各據職資共存禮體遞相鈐轄遵稟指揮如紊亂條章下不從上指使前卻使酒訛言其長行犯者委本都副兵馬使已下節級科罰其副兵馬使節級犯者委本都頭科罰其都頭犯者若無事不出時錄罪

申奏若出軍指使之時便委隨處統將科罰其或所犯人
自負罪慙不伏首領刑責便即奏聞如指揮使都頭已下
但務顏情藏庇凶輩自招負累必不恕容頒下內外諸軍
知悉

修奉列聖陵寢詔

列聖陵寢多在關西中興已來未暇修奉宜令京兆河南
鳳翔等府耀州乾州奉陵諸縣其陵園有所闕漏本處量
差人工修奉仍人給日食祭告下太常宗正寺參詳奏聞

褒答杜崇龜詔

杜崇龜術精元象職在禁廷覩苦雨之霖霪視文星之變
異形於章奏足驗忠勤修德省躬朕誠有愧見災而懼安
敢忘懷載閱所陳深所嘉獎

施行程遜等所陳時務詔

程遜等所陳時務並關王道兼雜霸圖益國利民無所不
至成仁去害悉在其間救時病以良多比忠言之更切封
駁詔勅尤可施行餘據事條下所司

褒答馬勝詔

馬勝所陳理亦公當嚴刑去盜正切救時付中書門下告

諭中外於極刑之中不得因緣枉濫務在懲惡止姦審詳行遣

答盧文紀陳政事詔

盧文紀早踐班行迭更顯重動惟稽古言必爲時當朕求治之初首居輔弼之位能竭事君之節以申報國之勞引經義而究其本根合時事而先於條貫請宣學士兼召諫臣言陰陽序理之端人事調和之本又嚴修祀典精事神祇宜令有司依奏虔潔所云進忠良而退不肖除寇盜而恤惇嫠雖責在朕躬亦資於調變刑法舒慘宜令大理寺

御史臺明慎詳讞勿至冤誣選賢退愚宜令三銓選部精覈慎選所冀得人新舊制勅宜令御史臺與三司官員詳擇以聞

答盧文紀請對便殿詔

朕聞宮鳴商應則律呂和君唱臣隨則邦家理興化之本百代同歸朕顧惟眇冲獲奉基構慮生靈之未泰憂政教之不明旰食宵衣未嘗暫暇副我焦勞之意屬於輔相之臣卿等濟代英才鎮時碩德或締構於興王之日或經綸於續聖之時鹽梅之任俱崇藥石之言並切請復延英之

制以伸議政之規而況列聖遺芳皇朝盛事載詳徵引良切嘉歎恭惟五日起居先皇垂範俟百寮之俱退召四輔以獨昇接以溫顏詢其理道計此時作事之意亦昔日延英之流朕叨獲嗣承切思遵守將成其美不爽兼行其五日起居令仍舊尋常公事亦可便舉奏聞或事屬機宜理當密秘量事緊慢不限隔日及當日便可於閣門祇候具榜子奏聞請面敷敷即當盡屏侍臣端居便殿佇聞高議以慰虛懷朕或要見卿時亦令常侍宣召但能務致理之實何必拘延英之名有事足可以討論有言足可以陳述

宜以沃心爲務勿以逆耳爲虞勉罄謀猷以裨寡昧

答盧文紀請追尊宣獻太后詔

朕猥將眇質獲嗣丕圖暑往寒來知昊天之罔極憂深思
遠惟觸地以無容卿等學究源流文苞體要以致財成之
美復陳孝理之規援引古今鋪陳茂實道朕以愛親之禮
勉朕以追遠之文取則昭成明徵章敬仍加美謚益見忠
誠至於權立閼宮頗亦叶於時變勛勞莫報長懸陟屺之
心聖善斯崇且慰循陔之念謹依典禮景慕增深

令監祭使省視祭物詔

祠祭國家重事切在精虔若不提撕漸成踈慢今後監祭使每祭親視酒饌幣玉不得令饌料失於蠲潔如有所聞罪在監祭使其壇廟墻屋勿令䟽漏本司常簡舉修葺以聞

禁盛夏滯獄詔

運當昭泰時屬樂康思欲導和氣於雍熙布休光於幽隱將期恤物必軫深仁今以甫及蕤賓適茲炎毒宜茂好生之德俾敷在宥之文足以寬肺石之冤辭叶薰風之解愠庶遵時令獲奉天心宜令御史臺河南府運巡道州府自

五月一日已前見繫罪人常赦不原及已見情狀之外悉令疾速斷遣勿至淹停

禁進奉異物詔

朕聞奇伎淫巧增費損功古先哲王嘗戒其事朕憲章百代臨御萬方以其欲致延鴻必絕驕奢之漸將期富庶須除蠹耗之原每務實以去華期化民而成俗近者諸色進奉寶裝龍鳳雕鏤刺作組織之異曾經釐革尚敢踰違宜在舉行貴於遵守今後此色物諸處不得進奉所縣司不得輒通

量準盧損不便時宜條件詔

令錄之任總六曹之紀轄係百里之慘舒惠養吾民可以親承顧問內殿辭謝可如舊制藩侯郡守薦人或諧公事或有裨益不可全阻許依天成勅帶使相藩臣歲薦三人餘二人直屬京州羣防禦團練一人諸色官誥舉人春闈冬集綾紙聞喜關宴所賜錢並仍舊官給餘從之

答盧損陳五事詔

聽政不坐禮儀而合使先知牧馬趨朝道路而宜令有異況民家占侵於御路固合條流牛馬往來於天津宜須禁

止盧損益深奉職言切爲時詳五件之封章俾四方之觀政除光政門外下馬一件續有處分

答劉鼎請依故事薦人自代詔

設官分職爲時主之敷恩推賢讓能乃朝廷之盛事是以詩稱伐木史載彈冠俾拔茅連茹之時見力行修身之道劉鼎官居雉省立近龍墀因貢讜言請行故事欲使子皮舉善終明子產之賢鮑叔讓能不掩夷吾之略兼可以致同心叶力表後已先人克揚文子之風免有展禽之嘆舉實公當便可施行情涉阿私理當比驗

答許遜請停越局言事詔

上書言事諫署舊規各有所司豈宜越局若思出於位理或侵官言匪盡忠徒欲沽於謬直詞多率意實有望於指陳許遜所上封章請依近勅各司其事允叶舊章

飭中書舍人詔

近日告勅牒書寫生䟽裝褫鹵莽未欲便行罰責今後書禮裝褫並宜如法中書舍人辭告亦可以其人揚厯功效或訓或獎並宜允當又須體認急切如有宣取盡時應副無令稽緩

廟諱偏旁不宜全改詔

偏旁文字音韻懸殊止避正呼不宜全改楊檀宜賜名光遠其餘依奏

以安崇贊爲孟州司馬詔

安崇贊父有力皇家著之青史雖然得罪於先朝此日特行於延賞況頻逢赦宥可繼烝嘗亦欲忠義之士知朕念勲之旨擢爲上佐爾惟勉旃特授孟州司馬

量定廢秦王葬禮詔

故庶人從榮獲罪先帝貽禍厥身已厯歲時未營宅兆雖

軫在原之念宜從有國之規且令中書門下商量葬禮

選京員爲兩使判官畿赤縣令詔

近以內外臣寮出入迭處稍均勞逸免滯轉遷應兩使判官畿赤令長取郎中員外補闕拾遺三丞五博士列官寮選擇擢任一則俾藩方侯伯別耀賓階次則致朝列人臣備諳時政今後內有已滿闕月限外或偶是闕員宜便依此施行

附監舉人分別解送詔

凡布化條惟務均一苟公平之無爽即中外以適從國子

監每舉舉人皆自四方來集不詢解送何辨是非其附監舉人並依去年八月一日勅須取本處文解如不及第者次年便許監司解送若初投名未嘗令本處取解者初舉落第後監司勿更收補其淮南江南黔蜀遠人即不拘此例

答石敬瑭詔

父有社稷傳之於子君有禍難倚之於親卿於鄂王故非疏遠往歲衛州之事天下皆知今朝許王之言人誰肯信英賢立事安肯如斯

以夏令赦宥御札

王者父天子民深居高視恭已以行道褒賢以勸功蓋以
上承天休下除民瘼率輦下以勸天下闕一人而惠萬人

爲子爲臣不可不察朕惟寡德獲續丕圖奉先聖之神靈
荷皇天之眷祐寅畏夕惕罔敢遑寧思與將相王公良牧
賢宰共敷政教同致雍熙繇是詳酌政刑搜求利病以今
觀古夜思朝行才濟於時雖蒿萊而必采言干於道雖誹
謗而必容然而近歲已來多事之後邊陲尚擾府庫未殷
扞防必假於兵師供饋須資於民力旣未能便停征伐固

不可頓減賦租念乃疲羸勞於夢寐今歲爰自初夏稍屬
愆陽朝昏正積於焦勞祈請果垂於甘澤所宜行慶以答
殊休言念狴牢之人屬此鬱蒸之候苦毒之狀所不能言
況當長養之時特降哀矜之令應三京諸道州府見禁囚
徒自五月十二日巳前除五逆十惡光火劫舍持仗殺人
官典犯贓僞行印信合造毒藥外委逐處長吏據已發覺
未發覺已結正未結正不在追呼支蔓只正身招罪便疾
速斷遣并見欠省司錢物外諸罪無輕重一切釋放應天
下藩侯郡守令錄等爲我股肱作民父母必在精窮事理

杜塞倖門副我憂勤察民疾苦刑獄不可以阿曲法令不
可以滋章私不得害公利不得傷義長思砥礪共致隆平
凡百庶官宜體朕意

欽定全唐文卷一百十四目錄

晉高祖 一

赦事潞王從珂諸臣罪制

授趙瑩門下侍郎平章事桑維翰集賢殿大學士

制

授馮道門下侍郎平章事制

贈王思勲左武衛大將軍制

平張從賓赦制

復陳保極官制

復范延光等官爵制

冊于闐王李聖天制

封王繼恭臨海郡王制

封迴鶻奉化可汗制

元日推恩制

封王建高麗王制

改唐莊宗陵名詔

遷擢中外臣寮詔

追封萬石君詔

贈李遐右諫議大夫詔

獎張允駁赦論詔

慎刑詔

放定州夏稅詔

獎王易簡進漸治論詔

升汴州爲東京詔

停兵部尚書王權官詔

許百姓鑄錢詔

過格選人準降資注官詔

禁擅加賦稅詔

答曹國珍請修大晉政統詔

以宰臣一人知中書印詔

勒林恩鄭元弼歸國詔

立唐五廟詔

定朝會禮節樂章詔

欽定全唐文卷一百十四

晉高祖

帝姓石氏諱敬瑭太原人唐景福元年生事後唐莊宗明
宗累官侍中太原尹北京留守兼大同振武彰國威塞等
軍蕃漢馬步軍總管清泰三年五月封趙國公是年叛後
唐十一月受契丹主冊即皇帝位在位七年年五十一諡
曰聖文章武明德孝皇帝廟號高祖

赦事潞王從珂諸臣罪制

朕遠提義旅尋克皇都六部相次以奉迎兆庶畫時而安

堵旋茲底定已遂廓清應文武百官等早列通班各懷忠
節掩節雖淪於汚俗推誠必候於維新但當共罄嘉謨副
予虛佇虞秦可鑒在於用捨之間堯舜爲心方務含宏之
德勉堅臣節深體朕懷其兩班臣寮應事僞庭者並宜釋
罪

授趙瑩門下侍郎平章事桑維翰集賢殿大學士
制

天有寶圖應運者文明之主國調金鉉入司者經緯之臣
將冀大同須資良弼況謂建邦之始難虛納揆之官其有

霸府舊寮前籌上密歷歲寒而斯久宏益嘗多經艱險而
不渝忠貞彌篤式旌懿德宜舉徽章乃擇吉辰爰行並命
翰林學士承旨知河東軍府事正議大夫尚書戶部侍郎
知制誥賜紫金魚袋趙瑩儒中端士席上正人襟靈而萬
里坦夷行葉而四時繁茂洎陞簪履旦夕之贊畫過人每
侍籌帷遐邇之折衝在我翰林學士權知樞密使事正議
大夫尚書禮部侍郎知制誥賜紫金魚袋桑維翰文場翹
楚學海波瀾撓澄不變於二風躁靜同歸於一德誠抱兼
人之器諒懷經國之才十年伸揮翰之勞數鎮有從征之

役而皆功參佐命績顯坐籌蕭曹遠接於英猷房杜近齊
於芳烈成予丕業職爾元勲既協良辰難稽懋賞自董戎
而居廊廟繇內翰而秉鈞衡乃用器能佇觀變贊於戲優
賢異典有國新恩勉伸裨救之謀共致升平之治事繁罔
避言直勿辭永修魚水之歡以保雲龍之契瑩可金紫光
祿大夫門下侍郎平章事維翰可集賢殿大學士依前權
知樞密使事

授馮道門下侍郎平章事制

舜任五臣坐致穆清之化漢尊三傑克成王霸之基皆所

以君臣義通上下情洽得以寅亮大化導揚休聲百工允
釐垂衣裳而御宇萬方率服鑄劔戟以爲農式繇輔弼之
功兆此隆平之運朕謬膺開創初統寰瀛照臨將被於淳
風宰制實憑於良輔其有功宣締構業紹經綸兩朝翰翮
戴之勲萬彙仰陶鈞之力是宜重膺夢卜再踐廟堂俾光
新造之邦共闡無爲之化經邦致理翊戴功臣特進守司
空上柱國始平郡公食邑二千五百戶食實封三百戶馮
道禮天蒼壁鎮國元龜夏璜爲稀世之珍軒鏡是辟邪之
寶方諸才業良平有可差其肩較彼忠貞姚宋不得並其

轡可謂人臣之刀尺造化之丹青自明宗皇帝克紹基局
仰膺圖讖於草昧皇靈之際有攀鱗附翼之功密贊皇猷
靜司帝誥出納奉命周旋八年持葛秤以定錙銖浮殷舟
而拯沈溺四時成歲陰陽畢順於變調九德不愆朝野咸
推於表式緊予薄德獲被寵靈將惕勵以爲懷恐負荷之
弗克宜憑勲德共濟艱難是用重啟巖廊俾持埏埴水土
之崇資不改宏文之大柄仍兼於戲造滕陳謀爾無辭於
裨救開懷納諫朕不怠於聽從致社稷於昌期納生靈於
壽域共臻至理勿墜前功唯於大臣不俟多訓可守司空

兼門下侍郎平章事宏文館大學士

贈王思勲左武衛大將軍制

思勲早承家廕久列內廷奉王命而不辭顧賊衆而無懼
宣揚朝旨勸諭兵師遂被凶徒橫加殺害而聞厥父抱疾
其家甚貧不有旌酬何彰忠烈可贈左武衛大將軍仍以
思勲舊請俸祿終王元正一世思勲男候有長成者量才
敘錄兼令所司厚給賻贈噫以子之俸終父之年足表渥
恩以慰存歿布告中外咸使聞知

平張從賓赦制

雷雨作解表天道之推恩瑾瑜匿瑕顯國君之含垢顧惟
師古敢怠宏仁關河旣靜於昏霾綸綽宜覃於慶澤昨者
張從賓輒萌逆節遠結叛臣釁起三城悲纏兩地占據我
都邑虔劉我士民九泥欲閉於虎牢祆霧幾迷於鳳闕賴
乾坤垂祐將相協謀渠魁送死於網羅凶黨咸膏於原野
捷音繼振惡蔓皆除宜施曠蕩之恩以撫驚騷之地仍頒
霈澤徧及縲囚貴感召於淳和速盪平於氛祲天福二年
八月二十五日昧爽已前天下見禁囚徒除十惡五逆光
火劫舍持仗殺人合造毒藥官典犯賊欠負官錢外其餘

不問輕重已發覺未發覺已結正未結正並宜釋放應自
張從賓作亂已來有曾被張從賓及張延播脅從染汚及
符彥饒下隨身軍將等兼安州王暉徒黨除已誅戮外並
從釋放一切不問尚恐無知之人暗有恐動物色委洛京
留守河陽節度使明加察訪犯者重斷或無辜被害或徇
節忘生既抱沈冤宜申贈典應自張從賓作亂已來諸色
官寮內有沒於王事者並與追贈有子孫量才敘錄或是
諸軍小節級長行已下沒於王事者具給本家三年糧賜
有男成長者委侍司衛典諸軍內酌量安排富父春喉須

誅元惡文王葬骨式表至仁自張從賓作亂已來所在殺傷者並委逐處差人收拾骸骨葬瘞張繼祚在喪紀之中承逆豎之意顯從叛亂難貸刑章乃睠先臣實有遺德遽茲乏祀深所軫懷其一房家業準法雖已籍沒所有先臣并祖父母墳莊祠堂並可交付親的骨肉主張應有犯事人親的骨肉除已誅戮外並放一切不問所有祖先墳塋亦仰準此交付負國者天地不容爲逆者人神共怒永惟肸蠁實有感通昨出師之時將帥虔禱頗聞陰祐成此戰功唐衛國公宜封靈顯王其餘鄭州并汜水管內神祠宜

令長吏差官點檢如有隳損處便委量事修葺貴伸嚴飾以答陰功五嶽承天四瀆紀地自正當陽之位未伸望秩之儀宜令差官徧往告祭兼下逐州府量事修崇所有近廟山林仍宜禁斷採樵降黜之科既然不濫洗滌之道足使自新應自創業已來降黜者並可放還兵興已來邊疆多事或因虜掠或偶滯留歲序遷移家鄉迢遞魚腸雁足嘗懸骨肉之恩月夕霜天必起桑榆之思宜令收贖俾遂歸還自梁朝後唐已來前後奉使及北京沿邊管界虜掠往向北人口宜令官給錢物差使齎持往彼一一收贖放

歸本家興兵動衆蓋殄元凶伐罪弔民須安兆庶應內府
管界內今年夏稅近指揮只徵五分今以方駐兵師無不
勞役並宜蠲放於戲顧惟薄德屬此多艱敢忘御朽之規
思廣納污之道爰敷渙汗貴洽蒸黎更在中外輔臣文武
列辟同扶寡昧以致隆平告報寰區宜體朕意

復陳保極官制

朝散大夫衛尉寺丞陳保極夙蘊才名早登科第洎居班
列深顯器能近者假限旣違朝章是舉自聞左降深悟前
非宜推宥罪之恩俾奉自新之命勉伸傾竭繼俟陟遷可

復行尚書倉部員外郎賜紫金魚袋

復范延光等官爵制

節文

頃朕始登大寶未靖中原六飛纔及於京師千里未通於懷抱楚王求舊方在遺簪曾子傳疑忽成投杼尋聞悛悔遽戮姦回干戈俄至於經時雷雨因思於作解果馳賓介疊貢表章向丹闕以傾心瀝素誠而效順而況保全黎庶完整甲兵納款斯來其功非細得不特頒鐵契重建牙璋封本郡之土茅移樂郊之旌鉞至於將吏咸降絲綸於戲上穹之運四時不愆者信大道之崇三寶所重者慈活萬

戶之傷夷息六師之勞瘁遂予仁憫旌爾變通永貽子孫
長守富貴敬佩光寵可不美歟可復推誠奉義佐運致理
功臣天雄軍節度管內觀察處置等使開府儀同三司守
太傅兼中書令廣晉尹上柱國臨清王食邑一萬戶食實
封一千戶改授鄆州刺史天平軍節度鄆齊關等州觀察
處置等使賜鐵券改封高平郡王仍令擇日備禮冊命以
天雄軍節度副使檢校刑部尚書李式檢校尚書右僕射
充亳州團練使以貝州刺史孫漢威爲檢校太保隴州防
禦使以天雄軍三城都巡檢使薛霸爲檢校司空衛州刺

史以天雄軍馬步軍都指揮使王建爲檢校司空虢州刺史以夫雄軍內外馬軍都指揮使藥元福爲檢校司空深州刺史以天雄軍內外步軍都指揮使安元霸爲檢校司空隨州刺史以天雄軍都監前河陽行軍司馬李彥珣爲檢校司空坊州刺史

冊于闐王李聖天制

于闐國王李聖天境控西陲心馳北闕頃屬前朝多事久阻來庭今當寶厯開基乃勤述職請備屬籍宜降冊封將宏來遠之恩俾樂無爲之化宜冊封爲大寶于闐國王仍

令所司擇日備禮冊命以供奉官張光鄴充使

封王繼恭臨海郡王制

王者居域中之大以天下爲家兩曜照臨必覃聲教二儀
覆載咸有寵綏矧夫地鎮南臺心傾北闕遙識興隆之運
顯翰翊戴之誠得不並舉徽章式旌亮節爰當吉日遂降
明恩威武軍節度福建管内觀察處置等使光祿大夫檢
校太保兼御史大夫上柱國瑯琊縣開國伯食邑七百戶
王繼恭淮水源長緱山系遠代襲弓裘之業家承帶礪之
勲劔有龜文乃是干星之器玉稱龍輔允爲照廡之珍當

年已得於佩刀繼世連持於瑞節紅蓮綠水幕中多倚馬
之賓貝冑犀渠帳下悉曳牛之將號令而秋霜肅物撫綏
而時雨隨車嶽鎮一方風行萬里而況誠專會禹道著尊
周挂帆檣而遠涉滄波貢章表而備陳丹懇菁茅畢至無
虧任土之儀玉帛咸來悉是充庭之寶爾能若此朕實嘉
焉是用益以井田榮之黻冕階昇峻級爵極真王冀旌奉
上之心仍錫推忠之號於戲航深梯險爾無怠於恭虔崇
德報功朕敢稽於渥澤勉承休命永保令圖可特進檢校
太傅福州大都督府長史威武軍節度福建管内觀察處

置兼三司發運等使封臨海郡王加食邑二千戶食實封二百戶賜推忠奉節功臣

封迴鶻奉化可汗制

迴鶻可汗仁美雄臨朔野虔奉中朝一方之烽燧茂聞萬里之梯航繼至自當開創益效傾輸備覩尊獎之心爰降冊封之命宜封爲奉化可汗擇日備禮冊命遣衛尉卿邢德昭持節使之

元日推恩制

朕自勉副羣心恭臨大寶承歷代荒屯之後屬前朝喪亂

之餘每務綏和漸期富庶尋以東遷梁苑北定鄴都國力
既虛軍資甚廣所司以供億爲念督責是專嘗思凋弊之
民倍軫焦勞之意今我事漸簡農時欲興將導達於休和
用頒宣於渥澤宜蠲宿負以惠黎元應天福元年終已前
公私債欠一切除放

封王建高麗王制

王者法二象以覆載齊七麗以照臨既符有道之文是布
無私之化其有誠懸象闕路越鯨津首傾拱極之心久勵
事君之節得不示四時之信同萬國之風用顯英賢俾行

典禮大義軍使特進檢校太保使持節元菟州都督上柱
國高麗王王建天資閒傑神授機謀宇量矜嚴靈襟洞達
志堅金石操凜雪霜每切朝宗嘗勤事大守三韓之重地
仁義兼修定百濟之彊鄰恩威並振暨朕握圖御宇膺籙
開基遣猶子以朝天備彰忠節改名臣而稱賀益認深誠
而又敘立國之繇述連姻之舊慕予正朔顯爾籌謀是用
時舉徽章聿覃豐澤階升一品位統三師加以戶封兼其
眞食勉膺寵命以保令猷可開府儀同三司檢校太師依
前使持節元菟州都督充大義軍使食邑一萬戶食實封

一千戶高麗國王

改唐莊宗陵名詔

唐莊宗陵名與國諱同宜改爲伊陵應京畿及諸州縣舊有唐朝諸帝陵并眞源等縣並不爲次亦卻以畿甸緊望爲定其逐處縣令不得以陵臺結銜考滿日依出選門官例指揮隔任後準格例施行其宋州亳州節度使刺史落太清宮使副名額

遷擢中外臣寮詔

有晉開國新命臨人宜宏不二之規以廣無私之化應在

朝中外臣寮及節度團練防禦使刺史留守司及州府縣官等宜并與加恩擢材委任不問常例

追封萬石君詔

宗正卿石光贊奏滎陽道左有萬石君石奮之廟德行懿美宜示封崇用光遠祖之徽猷益茂我朝之盛典贈奮太傅

贈李遐右諫議大夫詔

東都奏留守判官監左藏庫李遐當張從賓作亂之際遣李彥珣強取錢帛李遐稱不奉詔旨安敢從命尋遇害朕

以李遐讀古人書持君子行攻苦食淡承家不墜於素風
激濁揚清厯宦咸推於貞操一昨叛臣猖獗凶黨憑陵而
能守正不回臨難無懼忘身徇節雖死猶生若無優異渥
恩何以光揚忠烈仍聞母老子幼鄉遠家貧宜超贈於華
資兼賞延於嫡嗣是覃漏澤慰彼沈冤可贈右諫議大夫
其母田氏封京兆郡太君所有子孫候服闕日量才敘錄
朝廷雖已特支救接錢帛粟麥其本官賻贈物色宜依常
例指揮仍長給遐在生官俸祿終母一世噫朕以薄德屬
茲多難致害忠良實多軫惻以子之俸終母之年用表盡

傷俾慰存歿布告中外當體朕懷

獎張允駁赦論詔

張允位居近侍志奉遠圖屬將來之助致小康覩已往之
頻行大赦若惠姦稍甚則蠹政亦多推恩務洽於華夷作
解冀調於疎數所貢論宜付史館

慎刑詔

刑獄之難古今所重但關人命實動天心或有冤魂則傷
和氣應諸道州府凡有囚徒據推勘到案款一一盡理子
細簡律令合格勅其閒或有疑者準令又讞大理寺亦宜

申尚書省省寺明有指歸州府然後決遣

放定州夏稅詔

朕自臨寰宇每念生民務切撫綏期於富庶屬干戈之未戢慮徭役之或煩以彼中山偶經夏旱因茲疾苦遽至流移達我聽聞深懷憫惻應定州所奏軍前夫役逃戶夏稅並放

獎王易簡進漸治論詔

王易簡手演王言心資帝業當開創之運以遠大而論天不能感變四時地不能躁成萬物況當革夏盡已從周化

未可以驟行事只宜於漸治不疾而速其在茲乎所貢論
宜付史館

升汴州爲東京詔

爲國之規在於敏政建都之法務要利民歷考前經朗然
通論顧惟涼德獲啟丕基當數代戰伐之餘是兆庶傷殘
之後車徒旣廣帑廩咸虛經年之輓粟飛芻繼日而勞民
動衆常煩漕運不給供須今汴州水陸要衝山河形勝乃
萬庾千箱之地是四通八達之郊爰自按巡益觀宜便俾
升都邑以利兵民汴州宜升爲東京置開封府仍升開封

府浚儀兩縣爲赤縣餘并爲畿縣應舊制開封府時所管屬縣並可仍舊割屬收管亦并爲畿縣其洛京改爲西京其雍京改爲晉昌軍

停兵部尚書王權官詔

王權昨差北朝國信使堅不肯收接勅牒兼有狀推托事故不遵朝命者王權久在班行衆推夙舊固曉爲臣之節宜遵事主之規豈得纔命乘輶遽聞托故莫有奉公之道益彰慢事之心若以道路迢遠則鸞閣之台臣亦往若以筋骸衰減即鳳山之冊禮纔迴旣黷憲綱宜從殿黜宜停

見任仍勒歸私家

許百姓鑄錢詔

國家所資泉貨爲重銷蠹則甚添鑄無聞宜令三京諸道
州府無問公私應有銅者並許鑄錢仍以天福元寶爲文
左環讀之每一錢重二銖四參十錢重一兩仍禁將鉛鐵
雜鑄諸道應有久廢銅冶許百姓取便開鍊永遠爲主官
中不取課利除鑄錢外不得接便別鑄銅器

過格選人準降資注官詔

過格選人等早列官途合依選限或值戈鋌之隔越或緣

貧病以淹延旣礙舊條永爲廢物適當開創宜憫湮沈可
赴吏部南曹準格召保是正身者與降資注官

禁擅加賦稅詔

朕自臨區夏每念蒸黎嘗夜思而晝行冀時康而俗阜其
如干戈乍息瘡痍猶多由是疚懷不能安席復又車徒甚
衆廩藏方虛雖賦租未暇於矜蠲而煩擾當行於禁止俾
除暴斂式洽羣心應郡守藩侯不得擅加賦役及縣邑別
立監徵所納田租委人戶自量自槩

答曹國珍請修大晉政統詔

國珍職居諫諍志在恢宏當其鼎社開基乃欲象魏懸法
請詳前代之編簡別創新朝之楷模以示將來甚爲允當
其詳議官宜差太子少師梁文矩左散騎常侍張允大理
卿張澄國子祭酒唐汭大理少卿高鴻漸國子司業田敏
禮部郎中呂咸休司勳員外郎劉濤刑部員外郎李知損
監察御史郭延升等一十人

以宰臣一人知中書印詔

皇圖革故庶政惟新宜設規程以諧公共其中書印祇委
上位宰臣一人知當

勒林恩鄭元弼歸國詔

朕仰承天命肇啟帝圖黃屋非尊蒼生在念旰食宵衣而
修庶政推恩示信以御萬方要荒未綏責躬勤止誕慕文
德不愆夙心乃睠甌閩素惟藩翰王昶昨修傾向來效貢
輸朕亦釋以前非待之厚禮越羣方之常例崇列國之眞
封爰及繼恭並昇方伯不謂恃其險阻肆彼僭差矯誣上
天狎侮君子左散騎常侍盧損等泛舟陽海持節遐陬王
昶自大自尊不迎不見寢停詔命脅辱使臣遣鄭弼再詣
闕庭使林思別陳狀訴隳君臣之事體希書札以往來悖

禮慢言長無畏忌朕顧惟寡昧虔荷景靈所慮德之不修
豈患人之未服然以失道愆義引惡素常人祇之心憤怒
俱至是用懲其跋扈何須振以威刑鄭元弼等處此亂邦
罹茲虐政諒非獲已良可哀矜宜令所司切加安撫所齎
文字及諸貢物不任通進并諸州綱運等勒林恩鄭元弼
管押速歸

立唐五廟詔

德莫盛於繼絕禮莫大於敬先莊宗立興復之功明宗垂
光大之業逮乎閔帝實纂本枝然則丕緒洪源皆尊唐氏

繼周者須崇后稷嗣漢者必奉高皇將啟嚴祠當從茂典
宜立高祖太宗及莊宗明宗閔帝五廟

定朝會禮節樂章詔

正冬二節朝會舊儀廢於離亂之時興自和平之代將期
備物全繫用心須議擇人同爲定制其正冬朝會禮節樂
章二舞行列等事宜差太常卿崔悅御史中丞竇貞固刑
部侍郎呂琦禮部侍郎張允與太常寺官一一詳定禮從
新意道在舊章庶知治世之和漸見移風之善